



20. august 2021

UKA 2021/67

Inatsisartut suleriaasianni § 33 tunngavigalugu matumuuna aalajangiiffigisassatut siunnersuuteqarpunga:

Inatsisartunut aalajangiiffigisassatut siunnersuut Naalakkersuisut peqquneqassasut siunnersuuteqaqqullugit eqqussukkanut akitsuutit pillugit inatsisartut inatsisaat nr. 19 30. oktober 1992-imeersup allanngortinneqarnissaanik, taamaasillutik kaffinnut akitsuutit eqqartorneqartoq § 1, nr. 11 atorunnaarsillugu

(Inatsisartunut ilaasortaq Jens-Frederik Nielsen, Demokraatit)

Tunngavilersuut

Ullaakkut kaffi. Kaffisortitsineq. Angalaarluni kaffi. Uagut kalaallit kaffisorneq nuannarisaraarput. Tamattalumi immaqa kaffisortuulluta. Taamaattumik, kaffinut akitsuutip peerneratigut innuttaasut amerlanersaat annertunerusumik aningaasaateqalissallutik.

Nunatta karsia ukiumut kaffit eqqussuunnerannut akitsuutinut 2 millionit ataatilaarlugit isertitaqartarpoq. Tamaat isigalugu annertugisassaangilaq, akerialianilli innuttaasumut ataatsimut sipaarut annertujaarluni, kaffit eqqussuunnerannut akitsuut peerneqassagaluarpas. Innuttaasumut ataatsimut kaffisiniarnermi puussiamut nalinginnaasumut (500 gram) 3 koruunimik sipaarutaassaaq.¹

Demokraatit isumaqarput, maani nunami inuuniarneq akikinnerulertariaqartoq. Qulakkeertariaqarparput, kalaallit tamarmik annertunerusumik aningaasaateqarnissaat. Ilaatigut tamanna pisinnaavoq akitsuutinik appaanikkut. Una kaffit akitsuutaannik atorunnaarsitsinissamik siunnersuut taamaattumik isiginiarneqassaaq, matumani katersuunnermi akitsuutinik appaanissamik siunnersuutinut ataqatigiisumik.

Demokraatit aallaavittut isumaqarput, pingaartuusooq, siunnersuuteqartutut siunnersuutit aningaasalersorneqarnissaannik siunnersuuteqarnissaq. Erseqqissarneqassaarlu, taamatuttaaq allatut aningaasalersornissaannut siunnersuutinut ammagatta. Siunnersuutip aningaasalersornissaanut siunnersuutigaarput aningaasanut inatsimmi ingerlatsinermut- ilassutitullu tapiissutinut sipaarniarnikkut aningaasalersorneqassasooq. Taamaaliorneq ukiumut 56 millioner koruuninik aningaasartuutikinnerunermik kinguneqassaaq.² Siunnersuutip uuma aningaasalersornissaanut siunnersuut tamakkiisumik siunnersuutit ilaattut isigineqassaaq aammalu matumani katersuunnermi akileraarutinut- aamma akitsuutinut appaanissanik Demokraatit siunnersuutaasa ilaattut.

Demokraatit siunnersuummut Naalakkersuisut maanilu Inatsisartuni partiit amerlanerussuteqartut tapersiinissaat neriutigaat.

Pisortanut aningaasatigut allaffissornikkullu kingunissai

Kaffit eqqussomeranni akitsuutinit isertinneqartut tamarmiusut 2020-mi 1.989.258,52 kr.-upput.

1

<https://aka.gl/~media/Skattestyrelsen/Afgifter/2020/Grnlandske%20Indfrselsafgifter%20opdateret%20december%20220.pdf>

² https://ina.gl/documents/para3637/2021/svar/038_2021_skatter_afgifter_JFNI_akissut.pdf



Pisortanut allaffissomikkut kinguneqassanngilaq.³

Namminersorlutik inuussutissarsiuteqartunut aningaasatigut allaffissornikkullu kingunissai

Suliffeqarfiit soorlu assersuutigalugu nerisassaarniat, kaffinik nioqquteqartut akimik appaasinnaangussapput. Suliffeqarfiit, sulinerup nalaani sulisuminnut kaffimik neqerooruteqartartut kaffinik pisiniarnerminni sipaagaqartalissapput. Neriniartarfiit kaffisorniartarfiillu, kaffinik sassaallisartut kaffisiniarnerminni sipaarsinnaalissapput.

Innuttaasunut aningaasatigut allaffissornikkullu kingunissai

Innuttaasut, kaffisortartut, kaffisiniarnerminni sipaaruteqartalissapput, taamaalillutillu qaammatit tamaasa aningaasaateqarnerulerlutik.

³ https://ina.gl/documents/para3637/2021/svar/038_2021_skatter_afgifter_JFNI_akissut.pdf